

«Nus vulain ans far vesair ed udir»

Uniun per la litteratura rumantscha

CUN SILVANA DERUNGS HA DISCURRÌ
CLAUDIA CADRUVI / ANR

Damaun suentermezdi salva l'Uniun per litteratura rumantscha (ULR) sia radunanza generala a Cuira. La suprastanza – ella è sa messa a la lavur avant in onn – sto anc vegnir elegida uffizialmain. Silvana Derungs ha surpiglià il presidi.

Avant in onn è ina suprastanza cun dus suprastants novs ed ina presidenta nova sa messa a la lavur. Tge experiencesch avais Vos fatg?

Silvana Derungs: La collavuraziun è stada fitg empernaivla. Benedetto Vigne era già stà pli baud ina giada en la suprastanza da l'uniun. Quai è stà in punct positiv, damai ch'el pudeva sa regardar co ch'ins fascheva tschertas chaussas u tge discussiuns ch'ins aveva già manà. Bun è era che nus avain cun Aita Dermont ina persuna che porta la

vista da l'autura en la suprastanza. Suenter la radunanza generala da l'onn passà – che steva in pau sut il motto d'ina crisa da l'ULR – avain nus duvrà in pau temp. Perquai avain nus l'emprim fatg in questiunari e tarmess a noss commembers. Uschia avain nus rimnà impuls.

Tge impuls?

Dals questiunaris avain nus filtrà ora che nus stuain esser pli preschents – dad in maun en la publicitad per che la gliעד vegnia cunscienta ch'i dat ina ULR e da l'auter maun per ils auturs sez ed en l'intern da l'uniun. Perquai avain nus cumenzà a tarmetter da temp en temp in e-mail intern, ina sort newsletter.

Tge cuntegna quest e-mail?

Nus rendin attent a prelecziuns da noss auturs, a publicaziuns novas, ad arran-

schaments litterars, sco per exempel ils Dis da litteratura a Soloturn. Nus scrivain era ora sch'i dat curs u concurrenzas da scriver. Igl è en in tschert senn novitads davart litteratura.

Tge suprastants han surpiglià tge resort?

Benedetto Vigne ha surpiglià las finanzas, Aita Dermont è actuara ed jau sun presidenta. Aita surprenda ensemen cun Uorschla Natalia Caprez la redacziun da la «Litteratura 31». Per organisar la retscha da prelecziuns «punct dubel» stun jau en contact cun la Chasa editura rumantscha.

Ina tractanda da la radunanza generala è «l'elecziun retroactiva da la suprastanza». Tge ha quai da muntar?

La suprastanza è vegnida elegida l'onn passà – ma betg uffizialmain, perquai ch'i n'era betg tractandà elecziuns.

L'onn passà avevan nus suttamess a la radunanza da schliar si l'uniun u da midar ella en in'uniun per ils Dis da litteratura. La radunanza n'ha dentant betg vulì quai ed ins ha chattà persunas ch'eran prontas da lavurar en suprastanza. Perquai èsi anc da prender suenter l'elecziun.

Tge plans ha la suprastanza per l'avegnir?

Nus vulain ans far vesair ed udir. Per exempel cun il program punct dubel che porscha prelecziuns en las regiuns u cun la «Litteratura 31» che duess cumparair en l'avegnir en la Chasa editura rumantscha. Nus vulain era porscher curs da scriver. Ils curs en gruppas pitschnas han adina purtà buns resuns. Anna Ratti che publitgescha proximain in cudesch ha ditg dacurt che gist in curs da scriver da l'ULR haja dà l'impuls per ses cudesch. Quai è in bel sentiment.